

清畫家詩史

第十一册

清畫家詩史補衲後序

拙輯畫家詩史初編時起自李唐歷宋金元明清總括  
六代草稿略具恐多掛漏且剗刷無力乃專輯勝清一  
朝博采約取閱廿餘寒暑始獲脫稿付刊適值東海徐  
公刻晚晴移詩滙致手民不給逾約年餘遲至庚午蕺  
事嗣有所得附刊各集之後近歲惡趣環生遺老凋謝  
古物遷徙讀畫緣慳復拚遊山水於太華百泉黃山白  
嶽匡廬台宕靈岩嶧山二勞三峽登涉歷覽藉天地清  
淑之氣以開拓胸次疏散憂鬱比來精神腰脚賴此運  
動差覺頑健每逢遠道歸來輒還讀我書搜遺訪祕又

積畫家詩百五十餘家彙刊一冊以餉同好類衲衣之  
百結存列鼎之一嚮詎同乞醯與鄰願比獻芹野老回  
湖少壯多病素願未償今景迫桑榆尙擬就性之所近  
擇與世無競於人有益經目覩可徵信者廢續纂述以  
貢獻於世傳之將來雖力薄心鈍倘假我數年得寸得  
尺或亦少有成就也

戊寅秋日七十一叟迂泉自識于北平文津街西街之  
君子館專館

補編張

衡字友石又字義文號晴峯河間景州人順治辛丑進士官陝西榆林道初爲部郎得唐雷氏斲琴賦詩徵題彙百餘家刻聽雲閣雷琴詩視學浙江士紳爲刊校臺實錄偶作山水筆致疎峭用墨湛潤書近蘇米子禮集刻寶墨齋法帖有稷亭詩選弟鎔字佩珩舉人工畫詩選有題其墨竹與扇頭米畫詩

李婆溝

巉巖雕績眩征眸劈斧粼粼夾岸收不道山靈太多事  
御來荒徼寫營邱

石花魚

黃河套裏黑冰開塞外游鱗蹴浪回雲罩闐闐且莫喜

征通傲吏幾番來

縣令以魚美攫媚上官民苦之余革網戶近稍安矣

喇嘛瓜

瓜黑質金章作柳葉篆文瓢亦脆美種

皆三百六十

炎景初消露井寒浸來紅玉赭瑛盤柳文自篆波斯種  
莫向東陵陌上看

甲子武林學署題澧兒婦熊氏子沐畫冊

錄一

廬山猶說遠公時蓮社年年負宿期開士至今留墮履

不禁禪悅在東籬

僧鞋菊冊爲張氏家藏曩曾借觀命樹護女對臨二葉

熊敏慧字遲度又字穎生江都人居瓜州順治乙酉  
舉人究心理學工詩古文詞旁及書畫有汲冷堂  
集

步竹園作

江月不受塵江水不受俗持我方寸心濯此清冷玉晚  
風過林筴翠寒聲簌簌烟光低映人髮毛沁空綠吟斷  
一園秋暗籟自相續夜冷露已溥夢遶瀟湘曲

文二訓字命時儀徵諸生自稱與可後人畫蘭竹自  
成一派子九皋與外孫焦潤傳其法後之效其派  
者號稱文蘭

村中卽事

一灣碧水護邨居况是清明二月初老樹青時人撥甕  
小梅落後客翻書時巡花圃培新土爲愛苔裯摘嫩蔬  
此是沖虛經妙處何勞更夢入華胥

劉傳馨本名啟字最魯號旅齋寶應人進士師恕子  
以貢生授詹事府主簿工書畫著有隸辯歷代畫  
法宗派說愛蓮居士詩

稼同樓晚眺同筠榭

落日下平楚高樓納遠風人來飛鳥外秋老稻花中萍  
梗家何在田園計又空悲歡無限事茲意與君同

崔冕字貢收又字九玉號素庵巢縣人明遺民性好游南北名勝足跡殆遍工山水畫樹根不著土蓋取鄭所南畫蘭例也有素吟集

過含山漁鱸口昔避亂居此

天淨秋無際峯尖日出圓人爭投市米鳥下破林煙紅葉高低路黃花大小田依稀村入畫坐卧十年前

金史字古良號射堂南陵人善詩畫具史才手繪自漢迄宋忠孝節義四十人各撰樂府以寓美刺褒貶名無雙譜姑蘇朱圭爲精刊行世

無雙譜樂府

鈔

甲上補

三



老博士九十餘遭秦火壁藏書帝王典謨天地久石飛  
海立終不朽濟南道上存一叟

伏生

龍門史陶唐以來至麇趾文章于古人宗師比之春秋  
則謬矣揚雄奇字萬八千劉向說苑五十篇彪固父子

精述作洽聞博物尊前賢龍門史誰比肩

司馬子長

褚 爽字澄嵐號瞿庵鹽山人父士奇有高節爽生  
蚤慧時邑屬河間郡以名諸生入瀛洲文社善山  
水主天津張氏遂閒堂與徐芝仙張西岩相頡頏  
交山西吳雯嘗爲題詠所畫並其先世行實載蓮  
洋集中著有南村草

南村雜詩

二鈔

東風吹未已青青柳向榮時攜雙黃柑聽此林間鶯村  
酒雖淡薄多飲醉亦成偃卧恣所觀海雲時縱橫僕僕  
風塵土薄暮尙遄征

凌晨驅牝牛就食向南谷牛飽我已饑還歸餒糜粥餒

罷就枕眠心閒睡亦熟覺來茗一盃重取離騷讀

按鹽山詩

鈔瀛洲十二子爲滄洲劉果實任邱龐壇吳橋王作肅獻縣宋符九鹽山褚爽趙炯趙丙趙兩趙爾孫河間提錄交河及絳任邱葉宣城也

劉源字伴阮祥符人漢軍籍官工部郎中供奉內

廷工山水人物花鳥尤精龍水吳梅村高澹人題

詩交贊嘗畫凌煙閣功臣圖朱上如鴻臚爲精刊

之權使九江進御審器式數百種製瓷多出手繪

奉勅書泥金忠經詩錄似張晴峯年翁

天王弘錫類率土竭愚忠奉勅色如戰臨池學未工昭

垂宣聖冊翼贊漢賢功未諳爭雞鶩遭逢睿鑒中

盧定字覲揚常熟諸生書學董文敏畫筆妍秀

弔逸民吳浩然墓

逸民新安人諱道配博學敦行鼎革後隱居教  
授卒葬虞山私諡清節先生

獨留清節照人寰皎皎孤蹤不可攀區宇共瞻新日月  
夢魂常繞舊河山千秋定論應稱逸百世風流可化頑  
虞仲山頭埋骨處松風謾謾水潺潺

尤書字二酉號雪浦宣城人從梅瞿山孝廉遊兼  
工山水花鳥人物筆致秀雋蕭散

自題山水

疏樹蒼山系客心意中多半是雲林平橋流水饒幽致  
更許何人策杖吟

胡 捷字象三大興諸生先世會稽人遷居天津與  
查蓮坡時相倡和工山水有讀書舫詩鈔

留別諸同人 壬寅將之吳門心穀大弟索余畫  
以誌別爲寫子久數筆別後歷維揚過秣陵登  
虎阜心穀如憶故人指顧圖畫應在山巔水澗  
之間聊藉慰雞鳴風雨而已

扁舟南去遠離別意難勝漸看好山水翻思舊友朋洞  
庭秋雨暗茂苑晚烟凝迴首高樓望還登最上層

齊周華字漆若號巨山天台諸生因病跛不諧於俗  
自號獨孤跛僂幼與次風少宗伯有二齊之目文  
有奇氣書法鍾王餘事作花鳥靈動有致遍遊五  
嶽名山嘗棄儒游方外號懵懵道士含元子尙古  
先生嘗因呂晚村案繫獄又署甚辱居士著有各  
山藏副本

游雁蕩過聽詩叟峯下口占

初來此叟擲掄過似怪含元不善詩游罷長吟重舉首  
儼然傾耳作相知

金 啟字奕山會稽人徙家陝西三原工詩嘗幕遊

商州有芝卿集

畫荷壽九畹先生

三原劉紹攸字繼貢號九畹雍正乙卯爲學使交河王蘭生拔

貢成均應宏詞科後薦經學歷官蜀閬州晉知縣政績卓然著述甚富

畫荷懶句筋畫花厭設色不寫蓮之姿只寫蓮之質姿也似美人質也比君子聊以壽先生一幅濂溪水

自題畫荷

蘋風蘆雨滿秋塘落盡紅衣露翠房此景年來無我分  
聞鷗野鴨自爲鄉

吳焯字尺鳥號繡谷錢塘人喜聚書有瓶花齋多藏宋元善本尤好延接名流其家古藤著稱花開四垂如瓔珞因築亭名繡谷爲觴詠地工詩古文詞有葑園詩藁

畫竹寄吳興友人

碧草殘碑文與可青苔斷壁管夫人都是吳興舊名物  
越看越久越精神

李志熊字耳山一字竹逸江都人丹徒廩生山水師方洵遠與羅兩峯友善

白題畫冊



險徑匪可測，鑿雲通別島。結屋在山腰，捲簾春正曉。

許廷錄又名逸字升聞號適齋常熟布衣居海上工山水花卉有東野軒集

雪後看虞山

峯頭積雪白如銀，樹杪還疑糝玉塵。好景飽看逾十日，陰山飛落尙湖濱。

許淳字古初常熟布衣工畫小竹有吟亭詩稿

送梅菴上人移錫西林

三峯分法乳，飛錫度西林。水曲開初地，樓高落梵音。風塵知我老，心事爲君深。試問中宵月，淒清照獨吟。

程兆熊字夢飛號香南儀徵人書法虞永興亦精篆  
隸寫生稱逸品與新羅齊名

秋懷

秋意偶然覺指頤歎索居難憑歸去夢頻看寄來書月  
冷搗衣石風驚拍浪魚生涯一杯酒身世兩何如

歐陽復旦字爽谷號晴峯江都諸生工山水精書法  
尤長于醫卒年八十一

旅舍送客

幾度傷離別曾無惜別詩恥將倔强性竟作慘悽詞雨  
冷燈昏夜風號歲暮時君今束裝去動我故鄉思

喬 鐸字元溪號斯齋寶應人進士萊孫官夔州知府工繪事

灑西草堂坐月

七月十三夜蟾蜍屋角東四山皆蟋蟀一院祇梧桐不問來何地偏宜著此翁披衣清露下獨坐愛秋空

洪 聲字寶田號月航儀徵人康熙乙酉以詩召試侍直內廷出任涇陽縣丞有綠雲草堂詩

題自畫梅花

瘦盡東風總是癡雪香深谷獨開時紙窗茅屋疎疎影  
寫出林家照水枝

沈鳳字凡民號補蘿江陰人歷官江寧通判徽州同知凡七攝縣事詩書畫稱三絕尤精篆刻有謙齋印譜

甲子長夏署篆涇溪登文明樓見四圍山色皆入畫圖拈得景趣頗近黃子久筆意題一絕句

四望雲山萬疊高山中那復有塵囂雲山如此不歸去  
辜負滄江水一篇

山中何處是神仙消受風光不計年活火烹茶栗子飯  
興來把卷倦時眠

宋作梅字宜園徐州銅山人乾隆丁巳武進士官寧

波游擊

自題彭城圖詠之一

子房帝者師折節圯橋履誰歟授書翁黃石寓言耳空  
山不見人疑有赤松子

子房山

陳曾公字笠亭直隸易州人以明通榜授南皮外翰  
升任汾陽介休令多惠政致仕後乾隆辛卯進呈  
祝嘏詩乙巳丙辰兩預千叟宴善書畫著有有竹  
亭詩鈔

詠酒葫蘆

寬腹纖腰體骨輕用他貯酒實能盛花間柳下攜將去  
不羨辛家截竹罌

迂辛截竹爲罌用以貯酒

題自製乾皺墨荷

倪迂焦墨乾皴法不畫青山畫芰荷花葉雖無紅與碧  
靈根長自浴清波

畫芍藥贈金遠峯

相逢無幾又臨歧  
未別先愁別後思  
搜索空囊無長物  
畫枝芍藥贈將離

周得壽字百齡號菊畦雲南通海人乾隆丙子舉人  
工詩文善畫

肅宗

齋禁深嚴值內祠侍臣簪筆進青詞八方水旱休傳奏  
御廩新收萬本芝

程以位字品山號豆田江都人少孤後以哭母喪明  
工書畫善白描人物有豆田詩鈔

人曰

歲序依然換人情自覺新六旬催白髮五日駐青春庭  
雨澍殘雪村醅款舊賓老來更頑鈍慚愧值靈辰



石 頤字正也號養齋如臯人以貢生考授州同知

山水法麓臺

琵琶亭

蹤跡頻年漢水濱  
思鄉懷古鬢如銀  
青衫莫漫悲司馬  
我亦天涯淪落人

張廷楫字汝舟號厚菴一號竹屋甘泉諸生工書畫

雨霽

農務齊三月郊原雨歇天  
平蕪下積水古木響春鶻  
野遠雞豚逸村深草樹連  
壺觴就野老應共汝陶然

吳叔元字思堂號金山農儀徵人工篆書善山水

秘秋過竹香堂

西風白露下庭除，酒興詩情大不如。  
偶值米顛書畫舫，嬾尋徐孺水雲居。  
魚灣烟靄日將夕，射圃秋梧葉又疎。  
幾許清言見滋味，白頭心性本樵漁。

王濤字又山，江都人性樸雅，有古誼，善鐵筆工畫。  
佛座蓮菊

籬畔秋深菊正開，何須金粟見如來。  
綠雲高擁蓮花座，自有空香散滿臺。

江嗣堦字晉昌，號青渠，江都人，進士，廷泰弟，善畫能詩。

高郵

滿江明月過秦郵，憑借清光草木秋。一段淮南好風景，

畫圖誰復繼文游。

李公麟有文游圖

汪榮懷字慶人，儀徵人。山水樸雅，有白門紀遊草。

橫山磯

嶢昂城上山，滄溟城下磯。空亭對秋水，沙鳥一雙飛。

江藻字揆庭，常熟人。飛濤子。諸生兼工詩畫。

題桐陰小照

境靜息塵機，高梧墮空翠。幽人愛秋影，倚石此遐寄。獨

坐澹忘言，小奚抱書至。

曹麟開字敬我貴池人工山水有雲瀾集

深院碁聲圖

一杯航坐隱瀟灑謝塵氛  
花嶼澹流水草堂來片雲  
如遊白鶴觀閒對青桐  
君玉子落清晝瑄瑄誰與聞

嚴 鈺字式如號香府嘉定人高宗乙酉南巡製江

南好詞十二闋分繪山水爲圖以進蒙嘉獎供奉

內廷授揚州開官畫筆淡遠摹石谷稱能品

自題畫冊

多畫爭如少畫難蕭蕭幾筆足  
荒寒爲知俗眼偏求益  
添寫雙舟落遠灘

吳錫麟字上麒號竹泉嘉興人乾隆乙酉舉人官嚴  
州遂安學博有自怡集

自題墨菜

枝枝葉葉饒生氣老圃終年勤灌溉偶然對景一臨摹  
要使兒孫知此味

硯池揮灑自生香漫說青藤與白陽疏食菜羹留別趣  
未容評品到膏粱

扇上畫梅題贈樊棣堂

君家失扇伴來索相待幾如舫篋人同舍有金收不得  
風流寫贈一枝春

王小蓮永州太守宸子初隨任湖南嗣寄居武昌官  
貳尹畫傳家學工詩

送甘司馬之任宜昌

江漢新秋放棹初巴東猿接武昌魚忘形交淡荷衣外  
話別情深竹葉餘一領朝衫常帶酒十年宦橐只饒書  
知君早切純鱸思城北何曾有故廬

王映山亦作影山蓮心太守猶子山水幕瀟湘翁頗  
能亂真

賞菊

濁酒同傾老瓦盆黃花黃葉雨中村不教獨飲虛佳節

且喜三秋似故園采采亂簪櫻帽影深深醉倒竹籬根  
先生於此懶迎送早晚客來休閉門

王 琛字匪石號古香常熟監生與修一統志授四  
川內江令遷廣西永康牧多政績年八十乞休喜  
寫梅有愛景堂集

人日詩

流光逐客不逡巡瑞筭驚添七葉新澗底雪融泉眼活  
屋頭禽喚柳腰伸三年汗漫傷春物一卷叢殘伴病身  
憶寄草堂詩句在梅花欲笑未歸人

譚見龍字文升號潛初乾隆甲子舉人官直隸龍門

樂亭知縣慈惠廉潔善山水

題顧鈍伯畫蘭

谷裏春從研北尋  
素心花復遇知音  
光風泛處香盈室  
惹得幽人欲撫琴

鮑 岡字雲策號輞山常熟諸生兼工書畫詩詞

憶棹煙

雙屐久不來  
花徑莓苔長  
薄霧暝前村  
春泉落清響  
好懷誰共言  
枯坐靜塵想  
不知修竹間  
朗然明月上

錢 美字中美常熟布衣家五渠號渠上人善花卉

題畫蟹



說是潭塘金爪蟹鄰翁分送到吾家今朝好過黃花節  
只少一壺酒未賒

王 岱字雲上一字次岳昭文人工詩善寫梅畫筆  
秀逸

燕子磯

危磯似飛燕不作呢喃語翩然大江濱四顧無儔侶  
席仲甫號補齋常熟上舍畫宗石谷

秋蘆

白露爲霜候花飛兩岸蘆無心迎客棹何意老江湖浩  
渺寒波靜蒼茫碧月孤風回聲淅淅驚起釣魚徒

林冠玉字寶樹山東掖縣人性高岸讀書不應試善  
寫蘭

做康節先生瓦盆歌步青方韻

細米乾柴不漏房

用邵夫子原句

青山老卧等仙鄉何功天地

能邀福有債風塵故薦忙松火更明珠照室瓦盆同醉  
玉爲觴安閒歲月關門好庭樹花繁徑草芳

傅葛天鹽山人工繪事有擊壤詩集

過王忠肅公墓

公名翱字九臬宣德中官吏部尙書墓在鹽山城南

風掃白楊葉復青頽垣沙磔列寒星宿鷗入夜凭翁仲  
田鼠窺人坐短檠奕代勳名嚴汗簡百年事業勒新銘

煙籠墓道穹碑在景止前賢車再停

白汝霖字旣霑號益齋南皮明經性愛菊自號晚香  
居士少隨其尊人灤州學博任所才名藉甚工草  
書善畫嘗自撰墓志載邑乘潛心理學爲鄉里矜  
式

感懷

架封蛛網案封塵酣破愁城酒入脣園舍荒餘三徑草  
詩篇老去一囊春晨星骨肉還留我風絮交游更幾人  
賸有吾家司馬淚青衫濕透暗傷神

趙履中字藹堂合肥人工畫

余索友人枇杷移種既諾而復忘之後乞畫扇爲  
作枇杷戲題

昔年許賜枇杷樹未見枇杷賜一丸今日圖中金顆顆  
枇杷只作如是觀

徐 涵字有容號仲米常熟武庠生少受詩法於王  
柳南彈琴丹青皆所究心老益耽吟有湘雲小草  
贈悟無和尚

病足栖廡外跌踟澹俗緣山因能靜壽樹藉不材全泣  
鬼詩鑄竹談經舌吐蓮客來常不送多事笑溪邊

毛晉昭字蔗坪常熟人監生工畫好遊

題畫菊

空齋何患有催租閒把吟情託畫圖一別晚香嗟隔歲  
捲簾看我更清臞

蘇孫瞻字甘漁號耕虞晚號耐寒太倉人以畫名海  
虞兼善人物山水花鳥初與許吟亭倪閒谷結詩  
侶稱語溪三布衣

卜居後書懷

五年浪迹似萍蘋遊倦仍歸語水濱千里雲山溫舊夢  
一庭風月穩閒身筍蔬分味供佳客菽水謀歡侍老親

守此硯田甘澹泊何愁破甑欲生塵

吳克俊字菊坡晚號蔗翁合肥監生工畫有羅雀山

房詩存

曹芷沅爲予寫聽秋圖賦謝

年少飛揚膽氣麤淋漓雙管擅生枯亂山古木荒寒景  
能寫秋聲滿畫圖

陳琪自號澹道人湖州布衣寓海虞鬻畫兼寫山  
水花鳥豪逸可喜

題畫蘭

人喜幽蘭香旁有荆棘在荆棘護幽蘭免得兒童采

楊欲仁字體之安徽巢縣人嘉慶乙丑進士官江蘇  
豐縣知縣工書善畫梅

和方蓮舫先生花朝對雨七賢雅集詩并畫梅留

別

讀君詩酌君酒知君胸中羅萬有遊遍蓬萊海上山歸  
來暫作煙霞叟春苗麗藻燦齒牙縱橫聯句頻叉手顏  
筋柳骨書興豪刷字筆類襄陽帚座間吏隱謫仙才許抑

齋詩酒無人出其右興來潑墨寫長松濤聲疑聽蒼龍  
吼治溪比戶聞弦歌鋤奸猶懼苗生莠叔度汪洋萬頃  
波黃琴士江淮草木知名久下筆頃刻千萬言歌呼嗚嗚

陋秦缶飲我醇醪鄙吝消黃公之壚首屈拇竹林雅集

追七賢

古香調  
臣芝山

元季宏博如澗藪宴客新開北海樽盤

餐味助春初韭如雲勝友偶追陪忝附盧前與王後邯鄲學步聳吟肩效顰忘却東施醜陽春白雪和原難畫虎或嫌終類狗感君盛饑何殷勤一曲驪歌當折柳寫梅聊贈一枝春墨瀟淋漓潑一斗滄洲滿壁顧虎頭霜毫敢詡龍蛇走祇緣知己屬梅花歲寒許共竹松友蘭亭觴詠古來稀此會也應垂不朽

黃培芳字子實號香石香山人嘉慶甲子副貢官中書負文譽爲粵中三子之一兼工書畫有粵嶽山



人詩文集

讀武侯傳

蜀漢山河赤手扶，千秋正朔在成都。  
天心已定三分局，王業何關八陣圖。  
伊呂勳名歸淡泊，君臣魚水瘁馳驅。  
南陽若許龍長卧，梁甫高吟自不孤。

蔡家瑜字石瓢，別號鐵鞋道人，合肥諸生，善畫工篆。  
刻尤喜游山水。

題燕子箋

楊花作陣入簾幃，隨上征人去不歸。  
匣裏紅箋無恙在，空梁又見燕雙飛。

張振夔字慶安一字磬庵浙江永嘉人嘉慶戊寅舉  
人官鎮海教諭有介軒詩鈔

題畫筴

室逼驕陽午正炊強將竹管換蒲葵畫成一笑清涼盡  
恰是雷收雨過時

沈道寬字栗仲先世鄞縣人籍大興嘉慶庚辰進士  
官湖南鄱縣桃源知縣工書畫有話山草堂詩鈔

自題所畫山水冊子於茶州官舍

鈔

客路蒼茫半九州煙巒雲嶂蓄雙眸年來筋力疲登頓  
自寫溪山備卧遊

唐鑑字鏡海湖南善化人徙籍山東肥城方伯仲冕  
子嘉慶己巳進士授檢討累官布政使太常寺卿  
廉直有聲卒年八十二諡確慎有唐確慎公遺集

荊州

蜀江門戶屬荊州巫峽巴夔據上游漢室英賢關運會  
楚王宮殿早墟邱湖湘襟帶諸流匯襄鄂屏藩一覽收  
可怪山川至清淑如何僞竊起奸謀

畫梅詩

懸崖兩樹花先放高潔情懷絕點塵放筆寫之殊不似  
開簾已見滿山春

錢寶甫原名昌齡字子壽號恬齋秀水人籀石侍郎  
孫嘉慶己未進士授編修官雲南布政使蘭竹傳  
其家學

題寒香小築圖

昭代詩人盛梅里清門文秀百年來六峯樓閣舊相望  
三李祠堂今又開老樹屈蟠忘歲月新枝低亞插莓苔  
何時畫裏尋幽勝挹得寒泉薦一杯

陳詩庭字令華號妙士一號畫生嘉定人嘉慶己未  
進士工山水銓縣尹不就主講西泠有深柳居集  
爲易疇程先生畫禮堂寫經圖呈四絕句

鈔

紛綸六籍沸笙簧一綫相承自禮堂寫向門前通德意  
便如身到鄭公鄉

傳經始見得其人有德從來必有鄰說劍補戈非難鄭

正堪傳注作功臣

按程先生著通藝錄於古劍戈考摭精詳

鄭珍字子尹晚號柴翁別號五尺道人貴州遵義

人道光乙酉拔貢丁酉舉人官荔波訓導以守城

功授知縣分江蘇其學貫穿經史爲西南鉅儒間

作山水蒼樸蕭散有巢經巢詩文集

題北海亭圖

并序 北海亭在定興縣東南三十里西江村明鹿侍御久徵搆以爲其

孫忠節公伯順讀書地也伯順事跡具理學宗

傳明儒學按泊明史其父正字成字海內稱鹿

太公爲范陽三烈士之一亭當江邨草堂之後

知止居之東園菲塗堊攝插爲垣前一柳樹旁

皆種蔬兩行灌木無欲齋詩所稱東園卽在是

萬歷己未伯順以爭金花銀移疾歸里明年魏

忠節公來訪之適孫徵君鍾元亦至同館亭中

唱和歡極相與如容城拜楊忠愍祠賦詩而去

天啟乙丑魏璫羅織魏忠節及左忠毅公坐熊

烈愍賊下詔獄左之弟光明魏之子學泚等潛

庚上補

三

行偵視莫敢舍者時伯順在榆關參孫文忠公  
軍事太公與孫徵君謀館諸子弟於亭遣徵君  
兄奇遇偕伯順門人張于度果中變姓名入京  
職館橐遣徵君弟奇彥與其孫石卿化麟馳書  
出關求文忠援而設匭置表於門招鄉人輸金  
應比太公日騎驢冒暑走醪數百里內助者響  
應而左魏已拷死明年周忠介公復以賊逮其  
友朱完天祖文護行先馳至江邨館於亭者三  
月時伯順辭武選方里居與徵君輸三百金四  
釀爲完賊計范文貞公時謝政令完天持書往  
文貞卽輸二百金齎至忠介亦斃杖孫文忠之  
解兵柄媚璫者借茅亭止生元儀領之矯旨削籍  
幾不免刀鋸止生客亭中前後三載以數年來  
此爲嵩融之壁天下皆仰北海風因顏曰北海  
亭且爲之記崇禎丙子伯順殉城石卿伏闕頌  
父忠不勝喪死徵君爲集石卿詩文於亭內遂  
名北海亭集同邑范一泉孫箕生士楫石卿子  
盡心妻父也故師友伯順順治戊戌屬天津戴  
司農道默明說爲圖謂當稱乾坤北海亭係七  
古一篇極悲壯司農孽孽分書五字於首圖橫

紙卷全用米法中無一人向藏鹿氏後失去伯  
順七世孫丕宗復獲之容城孫家道光戊申守  
都勻余過其署出觀之以亭之掌故傳記  
錯見乃括爲序復志以詩六月廿七日

黃芝萎地茄花明十狗五彪恣縱橫地轟天鳴覆乾清  
北海亭子乃孤撐亭中老翁一諸生舉手欲障斗內星  
惜哉當日事不成正氣耿耿留元精吾觀史家已吞聲  
此圖復出二百載頌洞千秋思古情蟒山壓筵蒼鬱蔥  
展圖慘憺來悲風江光黯黯雲冥濛若有人兮煙樹叢  
倏忽置身畫圖裏眼底盡是人中龍舉幡慷慨孫夏峰  
赤幘從之張果中策蹇掀髯去匆匆釀金無乃鹿太公  
團瓢深墨小鐙籠破柱複壁難爲容完天宋老俠膽雄



吳橋歸卧薊隆隆秘獄此時走尸蟲傷心投匭仍未終  
後來者誰茅止翁此老十萬兵羅胸婆娑柳下杖癡紅  
戟指尙自談遼東太常堂堂儒者宗晚學農圃悲天夢  
矯首似望孫文忠歷歷斯人肝肺同一重一掩吾安從  
大叫乃止一畝宮吾知畫師非俗工直以浩氣還太空  
吁嗟陽球不作司隸死清流故讓此曹子朱家魯褒徒  
爲耳獨此炯炯差足恃長歎英賢皆已矣捲去斯亭擲  
盃起白虹正貫旁溝水

楊 潔字邁飛常熟人性敏給能畫重節義刊有虞

邑幽光集

大書孝弟忠信禮義廉恥八字於屏各系以箴

盡己之心是之謂忠事上接下篤實可風苟且從事豈

曰由衷每念及此羞死姦雄

忠箴

黃富民字小田當塗人家蕪湖左田尙書子道光乙

酉拔貢官禮部郎中詩畫克承家學有過庭小草

三月廿九日潞河舟中大雪

人與春風一路歸蓬窗忽見雪霏霏飄零只認桃花落

諺云三月桃花雪

歷亂偏攙柳絮飛急指酒旂沽野釀更搜盡

篋覓寒衣獨憐扶寸方田麥凍損黃雲萬頃肥

陳 炯字月垞一字寅甫元和人道光壬辰舉人工

詩文兼善繪事有煮凌霄榭詩集

潁州苦無魚有餉鮮鮒者

未須彈鋏起悲歌有客烹鮮載酒過涸轍生涯憐我似

莊子涸轍之鮒  
本草鮒鮒魚也渡江名士比君多羹材蓬鱸無逾此風

味純鱸定若何飽我老饕翻噉嗜更無雙鯉託微波

方濬益字子聽安徽定遠人天才不羈官江蘇金山

知縣有吉金錄

爲子嚴兒繪水仙執扇并和山谷水仙花詩韵

洛川神人不渡襪朝來髣髴雲蔽月相逢乃在畫圖間  
翠羽明璫殊幻絕我從滄海朝帝城折取琪花持奉兄  
對此冰雪滿懷抱了無熱念胸中橫

施森柏號小癡合肥人喜畫驢性狷介不輕落筆人  
尤珍之有小癡詩草

感賦

當時籌遠氣何雄可惜丹青尙未工岸上骷髏江上血  
不曾寫入畫圖中

李文通字經畬號聽雨長洲人諸生有擁書樓詩鈔  
武林惠山鄧尉紀游草

書雁贈朱直生丈并系以句

世上風波到處生，孤寒天外掉頭行。身離故土能無概

概感也

出莊子。氣感殘秋，易不平。覓食最憐，增繳滿。依人終覺

羽毛輕，緣知嘗盡窮途味。徵苦宮甘

出淮南子

唳一聲

金樹淵字雋伯號侍香上海諸生山水工摹倣王椒  
畦深契重之

題畫贈王叔彝

山光樹色鬱葱葱，石徑如蛇曲曲通。一路莎隄穿碧嶂，  
幾家茅屋倚丹楓。談禪正欲尋開士，看瀑還思約醉翁。  
庵詰詩中原有畫，枯毫我媿虎頭工。

吳允徠字仲遠錢塘人竹言學士福年子官兩淮分  
轉母氏爲大興劉寬夫侍御女名蘭字仲咳善書  
工詩畫允徠山水得之母教氣韻近鹿牀

題畫

瀟瀟暮雨憶江鄉翠竹嫵娟一枕涼欲覓小樓煙水外  
待君歸去話滄桑

廷 爽字紫然號棠門語鈴中丞崇恩子能繪畫喜  
吟詠有留春消夏集

題曹夫子屬畫山水

秋雲出沒亂山巔萬竹陰森翠潑煙縱目黃茅亭子外

歸鴉指點夕陽邊

王建和字瑟雲儀徵諸生工詩畫有惕生庵詩藁

秋水

洞庭天外影湘水夕陽中八月煙波濶西風江海空晴  
光涵白雁冷意到丹楓好藉扁舟釣蕭蕭蘆荻中

樊 彬字質夫號文卿天津諸生道光乙酉以謄錄  
授訓導歷官湖北遠安建始知縣癖嗜金石壽近  
九旬喜吟詠遺稿甚富有問青閣詩集

自題畫冊

二鈔

空山常寂寂鳥道白雲橫樵子去何處惟聞伐木聲  
長松兩三株下覆茅亭小時有看山人倚遍蒼鱗老

漢河間獻王君子館博拓本

詩教炳千秋河間古蹟留漢博埋舊館毛壘弔荒邱

毛公

授詩處村碑想鴻都立書應馬帳收日華宮未遠遺璧

名毛經壘

訪炎劉又劉子重通守藏有日華宮博亦獻王作

庚下補

毛



李佐賢字仲敏號竹朋山東利津人道光乙未進士  
官汀州知府嗜古精鑒著有古泉匯書畫鑑影武  
定詩鈔石泉書屋類稿詩鈔

自題畫竹

寫竹未必似竹幸免似蘆之謂縱然破个破分詎能維  
肖維妙但恐爲與可所嗤仲圭所笑

詹一 同字蘭岑號通甫山陽人道光乙未舉人著有  
清河縣志工詩畫

蟋蟀

豈有聲難定緣知聽未眞苦將階下意說與夢中人風

露初侵夜星河欲向晨玉墀他日好亦未稱閒身

徐壽彝本名思元字漢卿天津人道光優貢官河南  
登封知縣工書畫有姑存草孫世章影印行世

題畫梅

嶺上先開一兩枝曾將春信報君知  
笑予筆底傳消息  
任意糊塗不計時

華翼綸字贊卿號邃秋無錫人後隸金匱道光甲辰  
舉人官江西永新知縣畫師司農有荔雨軒詩集  
墨莊二字爲岳武穆率兵過江西永新縣境所書  
今石刻尙存北鄉劉氏詩以誌之

武穆留題號墨莊劉家此物豈尋常鐵心自是貫金石  
椽筆猶應邁漢唐片紙流傳無價寶千張礎搨有寒芒  
偶因一飯酬良厚

相傳劉氏留  
兵一飯書此

浩氣於今塞草堂

題畫寄秦叔固

面溪背青山築屋聯舊侶相見話桑麻溪聲亂人語

潘遵祁字覺夫別字順之自號西圃吳縣人進士奕

雋孫道光丁未翰林旋乞歸隱鄧尉築香雪草堂

得揚補之四梅花卷因以名閣戴鹿牀爲繪四梅

閣圖享山居之樂逾四十年壽八十五工畫有西

副集

題畫蘭

危崖不可攀幽蘭補其罅樵斧莫空尋春風自開謝  
美人在空谷君子升明堂出處兩無負相期領眾芳  
自喜巖阿不世情任他茨棘兩邊生素心那許春風染  
長照寒泉澈底清

廖文錦字雲初嘉定舉人官南汝光道有佳想軒詩  
鈔

偶畫山水小障口占

遙嵐杳杳樹叢叢點綴溪山愧未工記得客行風景好  
平添一棹入圖中

葉英華番禺人蘭臺太史衍蘭父工詩詞有花影吹  
笙詞鈔斜月杏花屋詩鈔

題自畫梅花橫看

虛廊風走葉聲乾翠羽啁啾夜向闌有箇幽人閒似鶴  
花邊寒倚石欄干

尹耕雲字瞻甫號杏農桃源人道光庚戌進士官河  
南陝汝道初在諫垣以敢言稱有心白日齋集  
爲謝夢漁作畫卽繫以詩

茅屋深深白板扉好峯巖黛樹陰肥世間何事須吾輩  
如此溪山不肯歸

胡林翼字貺生號潤芝湖南益陽人道光丙申進士  
官湖北巡撫翊贊中興心力交瘁卒諡文忠著有  
讀史兵略胡文忠公集

咸豐六年五月麟士世弟自蜀南旋過鄂同人祖  
餞繪圖誌別余爲作鶴樓鄂渚於筵上李鶴人

方伯晝歸帆嚴渭春觀察

樹森

補成之率題一截

論交兩世最關情

先大夫與令伯同年同譜

廿載天涯老弟兄我欲

留君留不住頻揮別淚送行旌

吳湘字西巖號靜芳常熟人工花卉師楊曉村

友人山齋

幽居深鎖白雲灣，徑滿蒼苔靜掩關。  
爲有携琴故人到，卷簾青入一房山。

吳 熙原名履，中字弋雲，常熟人。性溫靜，工山水。

偶成

秋聲硯北過秋思，託毫穎庭前水。月光照見幽人影，梧  
葉韻涼颺籬花。色妍靚懷古憶廬陵，悠然悟詩境。

楊 森字雲谷，常熟人。工繪事，兼精醫術。

題畫

漠漠空山雨乍晴，溼煙壓樹暗還明。  
溪頭有箇垂竿老，坐聽西風落葉聲。

花沙納字松岑蒙古人道光壬辰翰林歷官吏部尙  
書卒諡文定嘗奉使至滬英人購得其詩集刊本  
屬寶山蔣敦復以西語譯之寫寄海外兼善山水  
曹儷生相國賜第在西涯博露庵嘗借居之賦贈  
半畝閒房孰主賓移家新與鷺鷗鄰窗前兩岸芰荷雨  
門外一溪楊柳春酒盞常招江海客笙歌能遏往來人  
雙雙紫燕如相賀又向雕梁盼壘頻

戈 渡字蘭舟河間諸生爲東長侍御猶子嘗客游  
揚州並主安吉講席有天華亂落山房詩鈔  
爲益之友人作春山煙雨圖



山難了了樹難清潑墨誰教下筆輕如此模糊看便好  
前途底事要分明

水仙

銀蒜青莖吐瘦芳祇宜清茗不宜觴儻教綉幕深深護  
須要金鑪少著香

吳克讓字筱莊號漚放本歙籍生揚州與張桂巖係  
中表習見揮灑遂工山水尤善花卉有漚放集

題畫竹

萬箇篔簹綠漸齊龍孫解籜迸春泥小樓一夜驚風雨  
都展雲梢待鳳棲

祁之鏐字季聞山西高平人竹軒督軍恭恪公墳子  
道光癸卯舉人官灤州知州嗜篆隸書山水疎簡  
饒意趣有荃提室詩文集過亭詞

寬夫世丈守辰州時購蔣氏書甚富既乞病貧不  
能載歸寄藏澈浦舒氏之竹坳春雨樓因繪圖  
寄意嗣君子重比部屬題時同治戊辰

清倅購書分四部

君家藏書以四部分度

未入歸裝藏澈浦斯樓

端合署羽玲

尊齋羽玲山館額爲龔定庵故物

竹翠山嵐釀春雨披圖

萬卷繫人思遠道何由致一鷗故山也有書連屋

余家在山

樓爲先祖藏書之室

手校丹黃是幾時

製斗帳畫梅於額率題

古有梅花國居然此睡鄉止宜畫蝴蝶未許宿鴛鴦東閣詩慵賦西溪夢正長瓶笙欹枕聽翠羽誤啼香

王柏心字子壽湖北監利人道光甲辰進士官刑部主事晚主荆南書院以能文稱著有樞言導江三議子壽詩鈔螺洲近稿

畫蘭扇上題贈洪右臣

良品

時游蜀歸過荆門見

訪

縹緲蓬山頂人言仙者居芝泥中秘籍蘭檢上清書密葉低承佩微馨暗襲裾高文煩起草只合用相如

王 拯原名錫振字定甫號少鶴廣西馬平人道光

辛丑進士官至通政使與呂月滄朱伯韓龍鼎臣  
號嶺西古文大家而獨無桐城末流之弊服膺包  
希仁以敢言稱故更名拯工書閒畫墨梅有龍壁  
山房集

畫蘭便面

一篙春水汨羅渾暮雨瀟瀟欲斷魂千里湘流人不見  
卻從何處託靈根

王 霈字潤田合肥布衣工山水有榆蔭樓詩稿

題鐵鞋道人畫松

道人作畫一身膽筆所到處天無功畫遍枯松三百紙  
紙上如聞萬壑風

葉衍蘭字南雪號蘭臺番禺人咸豐丙辰進士官戶

部郎中喜收集唐宋以來名人畫像多手自鉤摹

輯有清代學者像傳行世著海嶽樓詩秋夢龕詞

題嘉州太守婺源俞麟士先生

文詔

凌雲課詩圖

畫意詩情迥絕儔凌雲山色望中收風流雅會原難再  
合與前賢續舊游

嵐影秋光畫本開一時觴詠競追陪羨他桃李新陰盛

都爲山靈覓句來

庚戌上巳就東坡祠以詩課士會者百七十人令各栽桃李

彭瑞毓字子嘉號芝泉湖北江夏人咸豐壬子傳臚  
官編修出任雲南糧道工詩古文辭並善繪事

畫鶴林圖扇上寄門人郭懌琴

長清

飛入深山不記年瘦於秋葉冷於泉羽毛自帶烟霞氣  
飲啄惟安淡定天有子和鳴真是福向人不舞卽稱仙  
倦遊也有棲遲願恨不相逢古塞邊

傅壽彤字青餘晚號澹叟貴筑人家長沙咸豐癸丑  
進士以知兵薦召對稱旨發河南佐丁文誠軍務  
免散館授檢討留豫治兵歷官河南按察使有澹

勤室詩

辛上補

三

仿馬湘蘭法畫蘭用題絕句

湘波湘水白無煙  
留得前朝墨尚鮮  
日暮相思何處是  
秣陵秋雨十三年

王德馨字玉才號仲蘭浙江永嘉諸生性至孝有雪  
蕉齋詩鈔

自題紅梅

畫梅以色肖諒爲識者誦中有鐵石心妙筆不能到

黃雲鶴字緇芸一字翔雲湖北蘄州人咸豐癸丑進  
士官四川建昌道工寫蘭竹善彈琴有實其文齋

詩鈔

寫竹石答朝鮮李石坡贈蘭

美人擷瑤草因使寄湘纍報以琅玕竹爲君歌楚詞孤  
生守姱節寒淒無媚枝石爛海波竭寸心終不移

郭長清字懌琴號廉夫臨榆人咸豐甲寅進士官刑  
部郎中能寫竹梅有種樹軒詩草

爲李硯耕同年畫梅

本是孤山處士妻爲圖小照更標題莫嫌不著臙脂色  
一著臙脂品更低

陳喬森字頤山又字木公廣東遂溪人咸豐辛酉拔  
貢舉人南皮張孝達奉新許中丞順德李若農均



器重之官戶部主事旋南歸佐軍幕辦團練晚喜  
作畫有海客詩鈔

畫江上青山圖別許仙屏

羈韁初脫馬離閑心中萬事皆等閒浮嵐涵翠日在眼  
不忘惟有江上山卽今酌酒與君別江上青山見我還  
黃埃滿面逐襤褸富貴妄意青雲攀三載忸怩強唯諾  
青山乍見應汗顏惟君知我亦萍散離愁早落滄江間  
升沈出處忽異趣多情未免清淚潺臺端蕭颯抒胸臆  
雲木靈秀人自頑遙遙波流倚蓬立何能共看烟螺鬢  
人生留戀每如此家鄉南去多閒關

鮑瑞駿字四山一字桐舟歙縣舉人覺生侍郎桂星  
猶子官山東長山知縣嘗作畫題詩寄其兄子年  
觀察互相酬和

歸田詩錄奉天津趙晴嵐司馬同年

新

焚盡心香夜告天無端白簡放歸田詩人命達唯高適  
才士途窮幾鄭虔禍水生庭誰逆覩燦金多口奈頻年  
蕭然行李書三篋猶有人疑造孽錢

趙國華字菁衫直隸豐潤人同治癸亥進士官山東  
樂安知縣沂州知府工詩古文詞嫻六法嘗爲寶  
坻李鑑堂作望益草堂圖三河郝植恭夢堯爲之

序有青草堂集

車中望腰帶諸山

斜陽大道白沙明  
鈍馬單車過縣城  
鴻雁北來晴有數  
亂山東去老無名  
謀生安得田夫子  
誓死曾聞戚總兵  
絕塞由來關鎖地  
何因坐放虎狼行

胡翰字純甫江都人畫師陳筠溪李梅生

題畫贈蓮舟

蓮舟和尚一詩僧  
得句人誇齊己能  
翦取瀟湘秋後景  
伴他禪榻與吟燈

汪鳴鑾字柳門號颺亭錢塘人同治乙丑編修歷官  
吏部侍郎初典試山東嘗繪三香櫞於扇貽獎鉅  
野魏生傳爲佳話

爲婺源俞伯惠題其先德麟士廉防出守嘉州時  
所繪江亭話別圖

宣武城南一亭古本朝老輩輒題詩風前萬葦綠成海  
便有江湖浩渺思

太守才名滿蜀中郎潛蹤蹟記泥鴻文孫媚學親風雅  
范硯摩挲有祖風

李蘋字白香號墨仙嘉興人花鳥宗南田有十三

聲館詩鈔

對月

清光那顧客衣單  
潑上窗紗一味寒  
爲問今宵娟魄下  
世間可有幾人歡

張允達字夔齋號雲士秀水人工書宗法王聖教間  
學海嶽思翁畫師新羅不輕落筆兼工篆刻

寒柳

鈔

西風搖落短長條  
人去旗亭馬不驕  
金谷樓臺歌管咽  
玉關征戍夢魂遙  
月明灞岸疏無影  
煙冷江城淡欲銷  
想對荒隄寒不耐  
眉痕深鎖未曾描

黃炳堃字笛樓廣東新會人爲張南山太守門下士  
初佐戎幕嗣以丞倅宦遊湘滇工山水有希古堂  
詩存

題畫

薄宦滇南十七年買田無計負歸船何如畫出林泉趣  
滿眼青山不費錢

法良字可盦滿洲人斌良弟官江西糧道間畫墨  
梅有漚羅盦詩藁

左安門外宏善寺明韋太監園址壁有禹鴻臚之

鼎畫鶴陳太守奕煎書徐文長畫鶴賦甚工秋

日偕友訪其遺跡並搨顯親王所刻陳書鶴賦  
韋公池館荒蕪久雪奈花殘舊日陰好古不因懷二妙  
尋幽何事過雙林龍蛇滿壁皆生氣松竹盈庭悟道心  
賴有河間摹石本擅椎妙墨勝珍珠

鄧輔綸字彌之湖南武岡明經官中書因南昌被圍  
縋城省父奉檄領軍敗賊擢道員中讒謝歸主講  
金陵文正書院有白香亭詩

畫竹爲高大

微月吐素壁孤雲臥瀟湘泠泠數直幹苦心積風霜豈  
無嶰谷音窮節寄殊方鬱屈青冥委伶倫激哀商

朱寶善字櫻船晚號悔齋泰州人官福建海澄知縣  
工山水有紅粟山莊詩

題畫

傍水結茅屋波光照戶牖扁舟載酒游鷗鷺門前守  
流水曲成溪落花香滿地入寺不逢僧清磬出深翠  
唐際虞字贊襄嘉善人有春生草堂詩集

戲畫鬼趣圖

老尪乘醉戴烏紗蓬沓筵前走似麻每向豪華場內見  
底須新樣仿羅家

馬鍾彥字蘭士長洲人程序伯畫弟子早世



自題秋窗夜話圖

鈔

飛花飛絮滿春城怪底閑愁觸景生猶記滄浪亭畔路  
紅闌雙倚聽春鶯

諸可權字肖鞠錢唐人官湖北通城知縣工畫梅蘭  
江夏官廨和璞齋弟留別

如酥細雨拂衫塵久客先驚物候新故國芹香占夏午  
荒江萍迹話春申浮家尙似依人燕薄宦難蘇捫轍鱗  
十載滄桑無限感清談竟夕燭燒銀

諸可寶字璞齋號遲鞠可權弟同治丁卯舉人直隸  
候補知縣工畫山水有璞齋集

臨戴年丈文節公畫張溫利公詞意呈十兄編修  
夢影東華認賃廬隔牆鄰樹夜唳烏詩舲詞意鹿牀書  
正我聯牀風雨圖

徐煥謨字綠滄號叔雅桐鄉人諸生花卉仿甌香館  
有風月廬詩草

題畫

秋風歸棹轉孤篷十里楓林夕照烘正是吳江好風景  
卧吹玉笛過垂虹

王朝清字肖蘭永嘉人工畫有留硯山房遺稿

一蟹畫卷

一世獨橫行入畫亦寡偶想見漢長卿文章無敵手

鄭由熙字伯庸號曉涵歙縣人官江西瑞金新昌知縣工寫蘭梅有晚學齋詩集

自題墨梅

畫梅纔十日略得形之似何術取其神退而求篆隸

史念祖字繩之江都人早蒞戎行勦平捻回由晉臬歷官廣西巡撫有俞俞齋詩稿弢園隨筆

畫側枝芍藥一幀題贈英西林

金帶香絲莫漫猜廣陵嘉種有誰栽羣芳鬪盡春光老  
獨立東風背而開

張曾敷字筱颺一字抑仲南皮人惠潮嘉道雨帆進士春育子同治辛未翰林歷任山西浙江巡撫樸素靜穆政尚清簡喜藏弄書畫晚歲退居析津名寓廬曰淵靖居閒寫花卉自娛李小石入旗畫錄稱並嫻六法

題湖南城步戴惠亭學博先德墨香園圖

城步山深處高賢置墨香一官輕苜蓿六籍富笙簧綠柳開陶徑黃巾避鄭鄉披圖誦貽厥積善信餘慶

李兮簪字珊朋自號心禪子寧津人明經性敏慧早負文譽喜藏弄古器碑拓書畫工篆刻善山水詩

與駢文亦不落恆蹊著有袖海軒說詩八贅龔半  
千畫訣評註爲初學指示法門頗得要領

過今未是齋卽席作小幀題句

遠樹小於薺平煙密如織蜿蜒落飛泉白雲來相接誰  
向此中住琴書染山色

聞響泉弟自津旋里喜占一絕

津門水漲一帆開日昨聞君冒雨回料得行囊無別物  
好書應載滿船來

勗樹智姪

石谷當年稱畫聖下筆繞指煙雲動二百年來此調絕

小泉繼起稱後勁但使朝夕勤臨摹四王之駕豈難並  
他日跨元瞰宋唐庭前掀髯聽鳴鳳

家璠朋兄負氣好奇少所許可然屢躡秋闈不得志於  
有司清季時事日非家亦中落益鬱鬱不洽於俗初受  
山水法於珍同伯用墨沈厚造境幽僻篆書刻印神與  
古會然皆不多作輿到偶一爲之旋即棄去又不受人  
促迫故流傳甚尠與余生同戊辰又同嗜好偶以書畫  
見貽片楮零統已多散佚茲檢行篋僅得詩牋聯扇印  
章數事影附詩史之後  
以存伯墳遺韻而已

查 梧原名相字仲士號藹吉又號鳳來宛平人工

蘭竹有藹吉詩藁

客舍聞鐘

勞勞枕席未曾寗數到殘更側耳聽一似晨鐘催早起

不知孤客夜常醒

鄧毓怡字和甫號拙園大城諸生肄業蓮池爲桐城高足志高數奇垂老弗遇工畫有拙園集

題禹之鼎爲龐雪崖作種竹圖畫像

早歲書堂號綠雲老來養竹更慇懃披圖欣會先生意高節冲懷與此君

弔陸鳳石師

憶造謁相見時  
語綴爲長句

君臣已矣況師生空谷人來轉淚橫我老唯應問田舍子才何不拾公卿生桑滄海尋常事枯柳江潭故舊情爲問京華冠蓋侶可容忍死待澄清

王仁堪字可莊又字忍菴號公定閩縣人光緒丁丑  
進士授殿撰官蘇州知府善設色花卉

寄盛伯希祭酒

戊子典試江南祭酒亦典  
試山東先後登泰山焉

我從東來登岱宗眼前真見秦時松徂徠萬壑一俯視  
排簷巖巖猶青童天風吹子落寒碇孤根如鐵斷崖插  
穴石能舒屈蠖身出地已老潛虬甲山人鬪根向巖縫  
石盜清泉善移種尺幹都含古性情天材豈愛人盤弄  
意園公子意園伯  
希自號歷下來磊砢相逢意特中命隨一鶴  
付歸裝伴與片石作清供吁嗟乎京塵春送達官家重  
簾煖窳豐臺花蕭齋得此耐寒歲蒼髯古貌真堪誇獨



不見對松亭前萬松怪千億化身無一態袖得松巔膚  
寸雲歸與意園角眼界

沈曾植字子培嘉興人光緒庚辰進士官安徽布政  
使善書工詩山水不多作偶寫胸臆有海日樓詩

陳弢盦侍郎聽泉圖

鈔

詩來水樂宮聲在琴罷天風海色蒼白日再中雲復旦  
扁舟安穩返家鄉

題畫

滄海塵飛玉井烟蜉蝣衣楚漫堪憐道人且作神山看  
金闕銀臺在眼前

張 瑩字子琳一字鶴君雲南會澤人光緒乙酉舉

人國子監學正書畫詩氣勢雄偉有香雪館遺詩

媛公屬爲包鴻卿大令

家吉

作三峽歸舟圖并題

趙侯示我包君書倩我爲作三峽圖家鄰三峽苦未到  
執筆欲下還踟躕我聞三峽險莫測絕壁對聳千尋直  
中束江天一綫寬江流如駛舟如擲包君適楚游黔滇  
歸來復放瞿唐船人鮓甕頭不驚駭竇茲忠信危能安  
噫嘻吁竇茲忠信危能安人海何地無波瀾我心苦平  
筆力孱此中變態惡能傳中流振舵憂乎難謹與不謹  
毫釐間斯圖之作寧足觀爲君記取舟人言

勒深之字元俠號豕公新建人光緒乙酉拔貢性豪  
放詩有奇氣有蕉鹿吟

病中爲王幼霞侍御寫蘭

刻翠剗青抵萬言西風高嘯是沈寃靈均奇服無人識  
山鬼夜深容叩門

金蓉鏡字潛父秀水人光緒己丑進士官湖南永順  
知府工山水有潛庵詩草

自題山水

我今已入畫圖住白苧連村山繞廬明歲須添黃犢子  
興來便駕獨輪車

陳國順字視農號醒夢道人河南西平明經性孝友  
父歿廬墓學使旌之家金水河上有金水吟草

自畫山居圖

爲愛幽居好揮毫自落成懸看斜照處恍有讀書聲老  
樹遮茅屋殘霞媚晚晴是誰橋上步意若訪先生

曾習經字剛父號蟄庵廣東揭陽人光緒庚寅進士  
官度支部左丞有蟄庵詩存

題自畫南塘一角圖

一樹垂垂午蔭涼樓扉開處俯南塘不誇萬里崑崙水  
清絕滄浪是故鄉

李孺字子申遵化人漢軍籍光緒乙酉舉人以道

員需次湖北花卉松梅筆姿豪爽

爲程穆庵題其師武昌令華陽顧所持印愚遺墨

酒懷豪放如仙李書法工奇祖二玉雙玉龕前香一瓣

印伯詩宗玉溪玉局故以雙玉名所居寢門君有淚千行

狄葆賢字楚青號平子溧陽人初以愛國文字之獄

游海外後寄寓申江搜印書畫工山水著有平等

閣筆記

避地泰州

草草生涯白鷺飛柳絲菱葉露初晞却將身世忘情久

又聽花間鶯亂啼

陳曾壽字仁先號蒼虬湖北蘄水人太初殿撰沆曾  
孫光緒癸卯進士官御史工畫松兼山水詩傳家  
學有蒼虬閣集

戒壇卧松歌

戒壇之松天下奇尋常所見皆十圍一松據臺獨下垂  
橫出十丈猶變蜺健鵬探爪風在下渴蛟飲澗鱗之而  
縋幽欲引陰螫出承敬力負蒼崖危萬鈞壓空不及殆  
反走潛根應過倍雨洗蒼骨未濡足眼底渾河犯高塏  
雲開穿枝落日黃萬里暮色浮孤觴欲憑咫尺精靈意

貫入冥搜百怪腸

梁 莼字公約江都人有端虛堂稿

爲梁節齋先生畫菊題句

獵獵西風兩鬢霜相逢江上又重陽論文坐覺鍾山逸

補國應知涑水狂

溫公有嘗其狂直庶有補於國家語

病免卽今能浪迹

秋高憑遠幾迴腸年來未計支離甚共把黃花照酒觴

沈汝瑾字公周號石友又號鈍居士常熟諸生與吳

昌碩友善有鳴堅白齋詩集

畫瓶菊戲題

瘦菊九秋花古陶三代器一賦登高詩商聲滿天地

江雲龍字潛之合肥人光緒庚寅進士官編修改江蘇知府有師二明齋詩

爲陳澹然作山水大軸

澹然愛我畫兼詩客中造請勞不辭紙長垂几窘筆墨懸壁爲君渲染之遠山忽來七百里低樹恰著八九枝一船嘔啞盪春水隨君歸去知何時

陳延韓字移孫儀徵人光緒壬寅舉人工書畫

江上望虞山弔翁松禪相國

江色荒城外蒼涼起客愁可憐烏目隱不似赤松遊濡忍緣丹悃艱虞幸白頭空餘墓田帖字字粲銀鉤



侯汝承字意園河南杞縣人諸生爲壯悔堂方域後  
裔官行唐知縣花卉草蟲用筆秀逸喜藏印輯有  
意園古今官印句

爲班曉山畫絲瓜蜥蜴扇面并題

時丙子年  
七十七

不避瓜田捕蟲行紆紆颺蔓雨初晴謂蛇有足龍無角  
幸賴東方爲辨名

李祖年字摺臣武進人光緒甲午進士官汾州知府

題自繪王瓜蘆菔以誌昔日春明游讌之樂

鈔一

冬畦預養佐春盤應共唐花一例看自幸此身非熱客  
轉嫌斯味太清寒

陳嘉楷字治民號漁邨直隸蠡縣明經幼有夙慧戲  
畫同學面貌輒肖長從蔣編修式芬遊肄業蓮池  
師張主講裕釗以會典館保授鹽大使官山東昌  
邑冠縣知縣性通脫擅絲竹喜豪飲才足應變而  
介節不苟工山水梅竹有漁邨題畫詩錄

小幅山水

帆挂秋風鱸膾肥雲烟載得一囊歸江山爭競何時了  
畫裏收來無是非曩在山左節幕裁摺片尾紙用渴筆  
宿墨恣意皴擦以自游戲壬戌冬從  
敝簾檢得壽芬  
甥見索遂付之

夏日畫梅

夏日合毫畫雪難幾番梅雨洗酸寒冰心不解趨炎熱  
付與時人冷眼看

寫歷亭竹影贈友

何人補種歷亭竹竹下同遊憶昔年北海少陵聯句處  
幾根瘦玉蔓秋烟

傳 悟字惺堂號鐵鞋道人淮陰人一作楚州康熙  
中披髮入黃山初際嚴冬伐松支棚雪中自號雪  
莊覆以松皮遮蔽風雨名曰皮蓬時人重其高行  
助建寺宇乃易名雲勛薦入京未久還山繪有黃  
山圖浸木尤喜畫所見奇卉吳菘爲輯山花譜  
自題黃山花卉冊

白媚紅嬌千種態須知西府不爲奇海棠當盛忙茶市  
開落峰間人不知

山海棠

慈光一樹木蓮花紅點紅心眾所誇七出常時兼九瓣  
每因香重暗咨嗟

木蓮花

德 新字懶牧無錫宋村朱氏子工詩畫

乃奇禪師約同耀庵先過楚禪卽事

幾竿修竹一泓池隴畔柴扉片石支有客未來茶已熟  
閒將蕉葉寫新詩

復 顯字夢因號雪廬海鹽張氏子主揚州建隆寺  
善山水有雪廬詩草蔣心餘太史爲之序

登金山

一葉乘風破浪開登山更上妙高臺亂雲時復生虛壁  
疑有蒼龍聽法來

成 衡字湘南天津海光寺僧高雲和尚法嗣擅鄭

虞三絕有一笠吟集

將住天童寺查蓮坡以詩送行次韻奉答

入秋纔幾日塞雁已成行挂蓆催歸去編茅竊退藏君  
閒仍閉戶我老倦開堂他日如相問山前見石羊

律 然字素風海虞秦氏子鬢染長壽巷工詩畫有

息影齋詩鈔

中秋夜懷王柳南先生并堅其約

病逢佳節成虛度自分中秋有幾番方外寒交慚我在  
社中舊友只君存呼童預掃花間榻候客頻開竹下門  
若使不忘老衰衲何時理棹到荒村

聖通字貫一號拙存常熟王氏子爲長壽菴素風  
高弟詩書畫得其指授後主三峯清涼禪院

桃源觀泉

飛泉百尺下桃源最稱攜筇雨後看滾滾雲濤隨地湧  
層層雪浪逼人寒半巖常洗塵埃淨一脈遙通江海寬  
坐石細聽流水響不借煙寺暮鐘殘

化葦字蓮溪號雪航工畫爲聖通高弟

山居

綠陰如水夏堂涼一榻高眠午夢長忽被隔林鳩喚醒  
落花風裏焙茶香

顯 更字改菴號過也海虞僧善蘭竹

小山

添得祇園秀平堆一角山青嵐浮樹底碧岫列窗間徑

曲旋螺聳溪斜匹練環雲栖

寺名

憑作案低翠擁禪關

眞

靖字雪林一字孤嶼號幻存又號硯圃薙髮太

倉隆福寺後住虞山東塔寺善畫菜用渲染法

東塔書懷

野鶴行蹤何處尋廿年瓶鉢寄梅林半樓雲接青山迥  
三徑露團絳葉深夢破曉鐘清客思興隨飛錫淡禪心  
憑將籬菊酬佳節靖節詩堪細細吟



行 遠字蒼巖海虞僧能詩喜寫竹

獨坐

獨坐無聊且聽風小橋流水鼓琴同分明字句天然調  
不在絃中與指中

際 昌號可庵無錫人主虞山維摩寺工書善蘭竹  
郊蘭坡畫移居圖爲補遠山并和原唱

長醉人間何用醒幽居仄巷小門扃春蔬翦圃抽新甲  
臘釀開缸關老丁無曲和君吟白雪

居士新刻白  
雪山房詩草

有圖

倩我補山青明朝欲折河橋柳最憶辛峯似翠屏

將歸  
梁溪

祖 觀字阿覺一署覺阿本元和諸生張京度字蓮

民棄儒入支硎山通濟寺爲僧湯雨生嘗贈以詩  
王定甫亦有詩乞其畫梅所居名五百梅花草堂  
癸巳中秋題張桂巖畫折枝於金山之楞伽臺

湘煙一抹上毫端啼眼星星露未乾不是微波小翹楚  
旁人休喚雪腮蘭

蘭

殘墨和霜潑硯池翦燈細寫歲寒姿一枝折倒西風裏  
恰是陶公爛醉時

菊

曲檻疎籬落葉侵寒花幾簇旁牆陰莫言秋士聲華澹  
尙有傾陽一片心

秋葵

張侯墨妙噪京華沒骨徐熙此一家尙有秋懷無著處

調鉛渲染折枝花

此畫於光緒中  
游姑蘇購得

傅夢瓊字清漪貴筑人河南按察使壽彤女開州朱  
慶埔梓皋室夫早世教子啟鈴讀遂絕吟詠生有  
夙慧兼通文史書畫

寄外

家山烽火路艱辛紅豆相思夢最真臨別贈言君記否  
春來莫作未歸人

孫 鎮字慧貞玉田進士侍讀晉墀孫女攸縣知縣  
光燮女范履福室山水學石谷花卉法甌香有清  
風樓詩存

秋夜曲

秋鎗耿耿涼宵永玉露無聲下金井空山野鶴忽飛來  
踏碎庭前松月影

葛 遠字香根自號惜芳癡人湘潭人諸生楊曷炎

繼室兼工琴奕書畫翁姑治家綦嚴雖烹飪浣績  
操作無暇而詩詞日進有評梅閣集

家大人命詠史見志勉呈

幾人代父走征鞍遠戍邊城勝克汗一騎明駝辭火伴  
木蘭猶是女兒還